



Rabu, 4 Agustus 2021
Ogen: Esekiel 11:1-13



Kuta E Desken Kudin



Tradisi mereken persembahen tutungen man Tuhan ibas Rumah Pertoton, semal ilakoken bangsa Israel. Biasana daging si mehulina itama ku kudin/belanga kawah, janah lemak-lemak ras tulan-tulan ijadiken persembahen tutungen. Daging si bas belanga ndai ikhususken jadi persembahen si mehulina man guna imam si mbelin.

Pengakap imam-imam bagepe peminpin-peminpin bangsa Jahudi bas zaman nabi Esekiel, ia lanai banci kena pengukumen Tuhan. Isangkana ia daging si mehulina ibas kudin si la banci ise pe mbenterkenca. Jerusalem me kudin/belanga inganna banci berlindung ndatken keamanan. La ia nggit patuh nandangi berita pembuangan ku Babil bagi sinisuruh Tuhan. Gengkenna i Jerusalem janah iberitakenna berita palsu si mahanca melala jelma ndai ertahan la nggit nadingken kuta Jerusalem. Tapi Tuhan la terbuali. Peminpin bangsa e Yaazanya ras Pelaca ibinasaken Tuhan erkiteken berita la payo siisebarkenna. Pemimpin arusna mereken pengertin si mehuli man rakyatna, sebab man Tuhan kap ia ertanggungjabab. Ise pe si erpengakap ia aman i Jerusalem, irintak ndarat erkiteken dosana. Sebab ise si ikut ibuang ku Babil, eme si nggit ngaloken ukumen si patut ndatken pengalemi ibas Dibata nari. Sebab ia sadar nandangi dosana. Kata Dibata enda mpersingeti kita ula nyaman nggeluh ibas dosa, amin gia ninta kita kalak Kristen, ntah serayan ntah pengurus gereja gia. Sebab symbol-simbol e la penting ibas Tuhan. Adi lit salahta akuken man Tuhan, ula ndarami pembenaren diri. Alu sedar ras meteruk ukur siendesken man Tuhan geluhta ngaloken pengukumen erkiteken dosa-dosanta. Tan Tuhan kap si desken kudin si nelamatkan ras ngasup mpetungungkan kita jadi persembahen si mehulina.